

鄉賓一溪楊公暨配薛

一溪楊公有子啓新與黃士

逆交公娶于薛於余爲友

事余若丈人行余習公素

銘公者乃鄉進士李君所

次之曰公諱宗叙字由曲

傳允迪生知善知善生玄珩

廣景寧司訓塾生亨亨生一

爲博士弟子一坦公娶武榮

敏日頌數千百言偕弟令尹八





氏雙駒同舍生成歛祗讓顧再  
公竊自揆曰儒之利什而贏百  
營什一易為取辦哉吾計從甘

公而身服賈供父母饗殮養

貫貸緡錢以往公頻拾仰取

過當乃權子母錢悉輸之

計然耻姦富不屑為駟駘

已耳闐闐中人望見公遠涉

數嘗公公肯日益起數年之財

尹公領鄉薦矣公揣意本業

惟是數擊鮮稍貢輕煖為二老人奉兼力營大父母  
葬事不以關叔季令尹公屢瀕禮闈來往京師者十  
餘載水陸資斧一仰給公如探囊公肯為稍損矣已  
而令尹公由博士擢邑令未上卒粵邸宦橐滿然二  
孤孺在抱一坦公黃孺人聞不勝楚公忍淚進粥  
徐慰二尊人曰兒在何至以仲氏憂父母星馳之粵  
中扶輦車返綜其遺橐買田建屋以安二孤二尊人  
忘亡焉一坦公念季子宗尹無可為衣食業公微司  
其意遂捐已所市田請公折箸曰兒安得有田頃踵  
皆大人賜也有無與余季共之終不令季獨誣其孝



友蓋天性云督其二子學每譚及令尹公攻苦狀輒  
淚涔涔下夜呼請燈前與辯晰古今大義或迄子夜  
不休諸子姪有過失嚴譙讓不少假貸至今展轉相  
責因宗老固謝請改之乃許門以内凜如也公稟性  
坦洞無町畦城府口與心應足與口應遇事善摩畫  
當否而扶義激昂諸族屬雅相推重事無巨細必待  
公片言而決晚益攻岐黃俞扁術急病樂施雖甚風  
雨恒徒步赴之諸所全活甚衆而不自為德乃其德  
公者無涯矣郡邑庠上公行誼于郡延致為腊賓者  
三而公三辭其姓名如此歲己卯子啓新舉于鄉念  
公春秋高寢苦之矣俛授邑學博公詒書誡之曰世  
恒謂學博為祿仕率誕語耳周官之師氏專為窮途  
縻祿者地哉兒其念教學半之義以無負厥官啓新  
遵教惟謹滋陽人士欣然慶得師公聞之沾沾喜矣  
蓋又越二年而公孫載夢又用儒術奮公所謂業儒  
之利什而贏百豈真懸遠不可幾哉抑亦公積善之  
祥也公配薛孺人處士薛聰女也自歸于公輒撤簪  
珥佐廢著椎布操作治生計力甚凡公所為孝父母  
友比弟皆孺人贊襄之公欲置媵遣所親偵孺人意  
或風孺人兒子女多矣安用它姬子為孺人笑曰異



時及室子非吾子耶吾願胤嗣日昌耳何憂兒子貧  
遂爲公納側室林氏竟舉男宇新自孺人歿公如失  
左右手終其身念之不衰公子男四伯即年會郡庠  
生次即啓新己卯舉人今授滋陽學博次時新邑庠  
生薛孺人出次宇新側室林出墓在晉江一都之槐  
市山葬以萬曆戊子冬十二月初六日銘曰世有儒  
而賈公乃賈而儒其言呐呐其行于于好行其德富  
非陶朱家居孝友姜薛之徒衣布緝績伉儷與俱葬  
也同穴樹之白榆卜云龍吉勿問青烏曰賁茲新阡  
者爲龍駒與鳳雛

亞中大夫湖廣布政司叅政警庸林公墓誌銘

黃生索居山中歲云暮矣漳浦林生毓榛自雲霄前  
途凌寒疾驅踵門上謁爲其嗣父叅知警庸公請銘  
墓中之石曰先君子治命也余與叅知公同舉于鄉  
同官詞垣能悉公行業耳豈蕪言足爲公重公亦可  
謂有嗣矣又無庸以伯道爲公憾也乃按少司徒瑞  
峯盧公之狀而次之曰公諱偕春字亨元別號警庸  
晚復自號雲山居士先世出唐九牧漳故多林而居  
雲霄葭州者爲公始祖曾祖崇器有潛德崇器生琥  
蚤世配王氏遺腹生文貢矢志植孤迄于成立以葭



州近海多盜徒前途居焉文貢為邑諸生娶于謝而生公比公為翰林檢討封父如其官母封孺人奉封翁命疏陳祖母王苦節獲旌表焉公自少穎敏封翁授以六籍百家言輒能博綜解悟塾學諸彥咸縮手讓公先登矣嘉靖辛酉舉于鄉乙丑成進士讀書中祕時閩士與館選者二而莆陽陳宗伯薦南宮第二人衆目屬之當事者重公學行與宗伯相頡頏既散館並授史職蓋采公望云公性坦直無城府亦不屑隨時俗低昂居詞林扃戶讀書而已尤注意先朝典故廟廊政體人咸以公輔器屬公嘗一分校禮閣海內名士多入彀者以與修莊皇帝實錄成遷編修時江陵相棟國亦以實錄成晉秩得給綸命公道當制所撰述不肯侈為裝飾語典籍承江陵意指以勅公公答曰王言有體相公所自申飭也其誰敢違江陵深恚之越歲京察圖釋憾然不能有所瑕摘例轉公楚臬副使公笑曰摘我者楚相耳即副憲何必楚吾有二親在菽水可懼金緋可徒脫矣疏乞致仕歸歸而奉高堂寢饋與松菊婆娑足跡不履城市邑令馮李朱君雅慕公敦請公董修邑乘公強應之寓邑禪寺數旬經公撰集者皆信史也居九載而權相



歿銓部錄權相所廢斥者起公原官督兩浙學政封翁趣公曰君子道長茲其時矣公遵嚴命之浙中浙人士甲天下公所評薦若懸衡而較持鑑而別錙銖毫髮靡爽士被公賞識相繼掇巍科展達路者不勝編錄而陶太史望齡以補試拔置正案第一則尤稱神識奇事非券諸事後其孰能信之直指使繩公苛禮積相迂則憤然曰是猶作登瀛態乎乃其舉措又何狂誕也遂論公調歸政府諸公備論浙中狀屢貽書為公勸駕封翁復趣與偕行公寄家姑孰單車入都下需次得江右臬副備兵虔州虔岑岡巢穴不靖衆議僉主勦公謂勝小不武濫殺非仁諍之撫臺甚力顧撫臺業舉事用公言竟僇巨魁赦厥脇從所全活生靈甚衆尋遷湖廣右叅政分守荆西荆西湯沐重地時方苦旱甚公蒿目焦思與諸守令拮据賑救黔庶方倚公為命而忌者復撫前語中公公怡然曰區區此身今以還諸膝下必不令北山猿鶴帶憤含羞矣既懸車子舍日惟鍵關距躍于人世蔑如也作小齋扁曰讀書譚道諸後生小子執藝文就正者戶屨常滿公倒屣應之不為倦所居當雲霄孔道藩臬郡邑大夫以事過雲霄必造公廬請益惟與譚問閤



利病絕無一語及私見聞者益鄉慕之故事凡縉紳  
家居邨中月致輿餼公悉謝不受曰吾棲息衡茅遨  
遊山水間安步以當車甚適矣奚敢厚煩邑里費其  
取與不苟類如是公事二親孝處二庶弟友待宗黨  
睦而有恩念葭州爲瓜疋舊地肇建宗祠仍捐貲買  
田以供禋祀林氏宗共利賴焉先後宅封翁及謝孺  
人憂皆伏苦三年足不闕內寢四出擇吉襄事即山  
窮水盡不憚跋涉迨出殯而戚容哭踊觀者如堵塙  
鎮城內外至豎木標題曰爲仁德林封君營葬豈必  
大行之爲顯親哉然公自是毀瘁矣終喪甫閱載而  
若無人許相君膝席霽色而聽亦爲心折蓋詹司寇  
嘗爲余述之謂兩公足交相重也夫以公意氣而欲  
令卑疵纖趨之子迎颺扇斂之夫不動色操戈也難  
矣哉顧於公奚損也銘曰厄於權相猶可言也厄於  
直指使不可言也樹績于宦猶可諉也樹德于鄉不  
可諉也蓋惡直醜正以爲庸態而達人遺物有何削  
憊惟不朽者之長存又奚勞旁觀者之嗟嘅



江西德安縣知縣致仕封文林郎湖廣道監察御史月潭蔡公墓誌銘

龍巖月潭蔡公嘗負笈游溫陵一時賢豪士多景鄉願與交懽者公子侍御君復奉公命就溫陵問業不佞因獲陪席研焉而學士先生故識月潭公者咸忻忻羨曰是父是子蓋吾邑寓賢云公起歲薦司訓處州時侍御君已薦閩省矣或謂公且以子貴安用折腰下吏為公笑曰吾豈縻升斗祿哉顧區區蘊穉思一自表豎耳而括蒼士聞公名已企踵延頸待逮公至則必繩尺動講藝諸貧士修贊者一切謝卻人人



自慶得師矣嘗署宣平景寧二邑篆大率用廉平爲  
理訟無匿情案無留牘二邑之士與氓咸喜色相告  
曰夫儒而吏也廼駕輕就熟至是乎居三載賢聲籍  
甚以臺使者尉薦擢令德安既去而遺思碑亭于今  
屹然峙也德安當冠蓋衝達屬歲苦旱潦民彫法抗  
公心揆之曰嘔喻撫摩利用寬挾垢剔蠹利用嚴糴  
秀弗除爰害嘉穀乃下教令勅諸曹史脊自愛毋輕  
犯法諸曹史憚公嚴明既相戒後濯公復間貸其註  
誤者群小心析署中清平嗣廼覈徭賦畫爲令甲俾  
諸役得與民持符給楮吏無獲染指閭閻稱便嗣又  
覈郵傳掃除諸駟驢窟穴盈縮有程勾稽有法自是  
賓至如歸而民困亦寢甦息矣每私謂今世善宦者  
率用資格自低昂多曲法徇上官意心甚耻之其聽  
斷兩造務在得情即迂尊貴人不憚有豪家作姦發  
塚而蜚誣良民自解脫九江守誤坐良民重辟矣寬  
者號顛臺使復下郡郡移獄德安公奉檄躬詣塚所  
具得豪家扞罔狀則頓足嘆曰夫爲郡決曹而白寬  
獄者彼何人哉官可棄民不可枉悉次其辜功傳爰  
書操以白守守意弗憚比繙閱再三廼愀然悔曰吾  
幾爲奸豪所罔寬者獲釋自後隣有疑獄必丐詣德



安質成凡公所平亭蓋一月而易案者三人稱為神君仁父臺司核所部賢令必以德安為冠無何而侍御君成進士授中翰公聞命喜曰吾所自展監差足睹矣其未究者以付吾兒遂稱病乞歸當道力挽之弗為動歸之日父老遮道卧轍車為軹不得行焉公諱謨字宜中父處士公某歿公生甫及朞母吳太孺人夫志孀居撫公晁弟四咸底成立公痛父弗逮養居恒自念曰吾見吾母猶見吾父也每受餼饗輒以充慈罔甘脆無私藏蓄執母喪哀毀重弗滅性厥後直指龔公為表宅里揚母節亦重公孝思云公歸德安割俸餘之半以奉三兄時伯兄逝矣惟仲叔二兄無恙每杖屨相左右肩其養生送死如事二親先世故居鎮海曾大父以上墳壠在焉植封壤樹綽楔間歲必躬往展視即年八十餘老矣猶躬歷舟車冒霜露徘徊欷歔者久之迺返祖遺祀田數十畝值水漂闕公捐貲疏築仍成故業與子姓共備築盛蓋公天性篤摯其率親率祖不遺餘情如此晚以侍御君封如其子官貴倨矣獨凜然以持盈為戒食不重肉衣恒三澣兒孫歲製羅綺以進第笥之不御曰吾惜福以遺後人且可留贏積逮貧乏乎諸所加意族屬



飢授餐寒授衣婚授禽喪授賻皆節縮之餘也親賓  
宴集餘暇第扃戶偃息焚香煮茗聽諸孫頌讀或有  
以事投賄晚先生爲請囑者公徐答之曰吾曩爲諸  
生居貧日不敢廁足公門即邑令修玄纁羔雁招吾  
爲其子師猶趨趨不敢進今貴且老矣乃易嚮乎自  
是無敢以私干者蓋余雅交侍御君睹其鯁直清修  
卓爾大雅君子也至以陟岵故辭榮途年甫四十耳  
大都其表監大節得之庭訓爲多侍御君持斧過里  
公囑之曰兒其務修德毋務修憾而先是公葬母時  
嘗賢也爲豪宗所魁比侍御君貴豪宗氏負荆謁謝  
公曰此曠曩事業忘之矣人謂公實預以身教非  
苟言之已耳侍御君當之東粵有渡海按甸南意公  
聞而壯之曰天監有赫無遠弗屆爾其代焉海若且  
前驅矣蓋公之教其子不以艱阻動念類如是宜侍  
御君之有特操也公素康強無疾庚子夏條病癥結  
臨化無它語惟囑侍御君成宗祠焚責券命諸孫讀  
祖父書毋墮家聲而已歿甫及旬郡邑庠士群請祀  
公黌宮蓋棺論定諒哉公享壽八十有七配處士徐  
侃女累封孺人婦德母儀時稱媲美先公卒子男二  
長夢周舉已卯武科試例授龍巖所鎮撫次即侍御



君夢說甲戌進士侍御君卜以今辛丑十二月二十  
二日奉公柩葬于其邑九峯山之麓與孺人合厝先  
期馳書函太史高君所為狀來請銘於余余夙慕公  
屬抱痾巖藪弗克驅素車往銘烏乎遜廼銘詞則太  
史君狀具矣爰掇而系之曰行曾閔兮治召杜家萬  
石兮鄉畏壘倚德人兮振醇風挽澆漓兮還古始緒  
業未竟兮心所安鍾祥貽範兮畀之子雲樹蒼蔚兮  
閔幽扃餘光烏奕兮銘以竣

誥贈淑人陳母戴氏墓誌銘

楚之景陵有知名士孚齋陳公而同邑戴碩人為之  
配今孚齋公贈中大夫山西布政司叅政戴碩人贈  
淑人則以吾閩方伯使君為之子也使君貽書黃生  
曰某不肖藉先父母德誨以有今日自叨第竊祿于  
朝先太淑人遽棄栝椽又越七載而先大夫捐館舍  
感念風木怒焉靡寧先大夫之葬業已請名筆銘諸  
幽而墓未表也先太淑人窀穸計遭延未遂茲且與  
伯兄亟圖之於禮宜有銘念二事皆不肖藉以不朽  
吾親者願徼惠於足下黃生自顧非其任也既黽勉



勒不腆之詞表贈公墓則復於使君曰一之弗稱其  
 可再乎而使君固命之烏乎辭按太淑人父處士戴  
 翁錫母氏吳世居景陵之社湖里處士故儒家每燕  
 閒好稱說古今成敗事訓誡諸子女太淑人甫穉年  
 側耳改容憬然若有會也處士竒之曰是女也淑當  
 以婚佳士而參知公方著少穎聲屬有蹇修議則曰  
 吾聞其家多隱德後必有達者遂許委禽焉迨參知  
 公遊庠泮而出贅贅居閱載而太淑人歸時上有舅  
 姑中有伯妯諸戚獲食指衆又值歲之不易生業時  
 苦墊隘太淑人盡斥其資裝佐燈窓誦讀不為愆參  
 知公得淬志下帷為主司賞識聲燁燁于士林間諸  
 挾贊請益者戶屢恒滿時貢其脩脯奉二尊人旨甘  
 而太淑人茹荼習蓼力拮据贊之絮緼絺紵薪藁粲  
 醴每先時而具殖餌餠饅醢醢胾雁每應手而具陸  
 字水孳竹頭木屑無纖鉅咸為之所杼柚聲往往至  
 丙夜冬龜手夏浹汗不為少休爰相宅於祖第之左  
 闢堂構別自為居舅氏葵執紼之客數百人太淑人  
 躬理餼醢享之客無弗霑既者參知公課諸子業就  
 傳則饒贊結文社則饒饌精質經籍則饒青鈇繫太  
 淑入是賴參知公視課程而已督其諸子學桀矧

皇朝書林卷十五

古

李文四百



甚即諸子遂遂稱率教猶時以嬉惰煩呵撻方伯使  
君連捷賢書輟廷對旋里太淑人喜動色則倚門迎  
謂之曰吾非喜若一第也喜若不輕試耳比且赴闕  
下則又囑之曰若行矣吾且携婦氏視若仕宦而種  
德則昌熾之道矣蓋太淑人之母教若此性至孝姑  
黃太淑人素竒嚴難事獨太淑人用恭謹最得其懽  
至耄傳後特奉以朝夕旦視盥櫛宵視衿篋衣調其  
涼燠食調其飢飽疴癢疾痛時其抑搔諸所爲聚順  
者百方即歸冢介家不能越宿或強留之則曰姑非  
我食不飽寢不安矣其相叅知公恒承迎志意而爲  
之羽翼每祭祀牲牲肥脂蘋蘩釜錡必潔曰是君子  
之所虔也宗黨告匱隨多寡應之即傾篋不靳曰是  
君子之所睦也客至呼酒立辦滿座沉酣不以鬻耻  
告曰是君子之所懽也叅知公篤愛少弟與共有無  
迄頽白廼與昆季折箸方伯使君之舉于鄉也捐坊  
金分贍親族太淑人實調和愆慝之惟是叅知公性  
慙直多面折人過無所隱互太淑人時有隱諷或委  
曲解之俾爲寡怨地叅知公亦自喜謂閨閣之鹽梅  
焉諸姊姒凡四所與周旋其間皆柔聲愉色抑抑退  
讓比有子薦公車列曹郎見謂意得矣而善下猶故



也顧特善以德率人如有性狠戾虐使其婢者太淑人片言即解又時時擁護之婢私尸祝終其身馭大小臧獲獎其勤者扶其惰者軫恤其疾苦者有大工作輒治卮酒勞之使人人感奮而饒盡力歿之日無尊卑疏戚老幼咸爲悽惋揮涕叅知公則若喪左右手云太淑人以方伯使君滿工部考封安人比使君以大叅備兵雲中值覃恩贈淑人皆從贈公也誌以使君故稱太馬子三長所前任浙江武康縣學訓導次即方伯使君所學季所謨庠生太淑人墓在某山葬以某年某月某日孝哉方伯使君之慕親也蓋謂柳母允熊李母勅勤太淑人實類之廼其累功積善以培家慶舅姑稱孝姊姒稱讓宗黨稱仁又何德不備焉讀所爲狀信然夫其慈儀內則兼總盡善善業已三厥成矣顧於罔極之報歛焉未愜使君念及之輒摧腸灑淚不能自禁也銘曰謂德善靡報耶穠叢之豐故在也謂報未滿德耶負米之悲又奚以解也謂彼蒼叵測耶券餘慶以待也謂化臺長夜耶揭休光于億載也



南京刑部主事端石楊公墓誌銘

比部端石楊公以萬曆甲午九月初八日卒于官公  
之子宏道行營葬地者十載通乃獲吉于惠安縣上  
田埔之原卜于萬曆甲辰十二月十六日奉公柩葬  
焉先期持令尹謝君所爲狀謁銘於余嗟乎角州追  
隨隃艾永別即徵狀余能悉公顧泉路有期能令巨  
卿見夢否余握管爲之惘然公諱日采字原白高祖  
守恭家于泉之肅清里守恭生榮璉榮璉生榕榕生  
石峯先生士廉是爲公父比公貴贈父文林郎安東  
縣知縣母盧氏贈孺人初贈公學易困博士弟子而



仲氏貳守公士中治春秋領鄉薦於是贈公以春秋授公屬仲氏時時課之曰此已售之業也貳守公校公藝輒忻然動色曰是且振伯兄箕裘矣年十六入邑庠每從師講肄歸則就贈公館舍燈下督誦讀鷄鳴趣起公跋跋弗少懈余與公聯榻惰不能從然旦晝竊用自惕焉嚴師益友朝夕在也越三載而贈公不祿服除應督學試以高等受餼廩又九載舉于鄉是為隆慶庚午時貳守公久宦粵盡歸其祿入為田宅貲均諸伯季二氏公任家督撫諸從如同產綜理餘暇惟覃精典墳已耳或以干謁事請公笑曰吾藉仲父范幸無虞餽粥何至俛仰貴人前為凡五上春官不第則慨然曰上負尊人又不能酬仲父雖然顧自樹何如耳以乙榜銓授羅源學諭羅源士故聞公名相率趨迓于途蠡聚于廨舍群然用得師相賀而公却貧士贄與雋士講德談藝時廣集諸生校之割俸佐課饒竟日夕為品薦瑕瑜又無不心輸意愜矣會朝廷新遣京朝官典省試事命有司慎遴分校者公應聘之江右所甄拔皆知名士今太史劉君孔當銓部吳君仁度在選中士大夫咸稱公冰鑑云已而遷淮陽之安東令頃歲黃淮漲溢民幾為魚而安東



特窪甚田廬胥溺邑幾廢矣公按行堤岸陳牒當道先募役培諸護堤復循求堙蹟起故岸爲洪流障民稍稍有寧宇已乃修平望五港水門時蓄洩令更相洄注已又覈諸荒田招流移給之牛種導之墾殖量賦穀預凶荒備訂勿以履畝取盈凡公所爲邑民計大約如浚儀王景南陽召翁卿而焦勞過之民望風來歸者歲不下五六百戶居而歲屢侵催科不能及格公謂令即以政拙罷誠甘之顧柰此赤子何力爲請蠲貸情詞懇惻竟得請乃止而先是安東倣江南漕例民供賦者輸穀于官歲值不登至越境重斫致升斗狙獮復漁獵焉其直數倍重貽疲民困公又爲力請折解臺使者上其議于司農卒報可定爲絜令自是餘糧棲畝徵歛不繁公私並稱便矣淮陽牢盆諸賈轉鬻于支邑安東例有過壩稅令寔董之前令率密畧巧索延納餽餉以爲愷公嘆曰官而與商市也法乎嚴飭諸賈豎毋輕溷我賈重譴而勾稽無積蹙稅入無羨耗吏胥無染指則益人人嘆服諸上官過使至者供具取不乏而已矢勿飾厨傳以爲問問擾署中一蔬一肉悉按直買諸市時而食無魚餅止罌傲然自適也公雖用撫字著愷悌聲然性資果決

田賦

卷五

陳裕四百



庭無宿訟有巨豪積隱占詭販諸奸狀據窟穴莫從  
究詰公曰養稂莠者害嘉穀殆謂是矣立按劾捕置  
重繫群奸為之屏息每旁郡邑有懸獄當道必移公  
訊之凡公所讞鞠兩造帖然即麗重辟者皆曰死無  
所恨公復以暇時興學育材賑貧士舉孝旌廉種種  
應古誼為諸隣邑風焉居安東凡五載賢聲籍甚諸  
使者薦剡二十有三旌獎稱是以治行最奉璽書徵  
矣用常調得刑部主事而南南曹事簡灑然以翰墨  
自娛間有所聽斷亦灼情麗法如宰安東日然以為  
令時焦勞久體羸憊不支未閱歲病卒家人假貸以  
殮同官為疏牘鳩諸義故助治裝廼得歸其貧如此  
方公病困言不及後事惟曰吾竟負仲父第服厚長  
者訓無敗名藉是見下里公生嘉靖庚子五月初八  
日距其卒之年享壽五十有五公配贈孺人蔡氏繼  
林氏又繼陳氏又繼封孺人陳氏今與公同穴者為  
林孺人孺人毓自名族賢明識大義相夫君勤處妯  
娒睦諸子女皆孺人出子男三長宏道次紹唐俱庠  
生次紹丙嗟乎吏治莫核於兩漢朱邑尹翁歸死  
無餘財張堪去蜀之日拆轅車布被囊而已天  
而追悼之至為下詔褒獎賜其子金帛兩漢優廉吏



若是然亦厘厘矣公用卓異徵乃厘得留署食貧以  
歿誰復知者古今寡廉吏以此公子宏道篤行能文  
且克竟公志銘曰謂廉吏不可為良有激耶謂有陰  
德者饗及子孫今猶昔耶公之廉其遺以清白耶公  
之惠淮陽其永世德耶子克亢宗其究孔碩奚必待  
寢丘以為報又奚必身加紼而受殊錫耶

封太安人史母李氏墓誌銘

太安人李氏者宮允史世程君之母也君奉母就京  
邸養會 天子建儲當遣詔使于朝鮮所司推宿望  
詞臣堪為皇華重者宜無如宮允比疏名上而  
天子忽庚用其貳者居未幾太安人卒獲有子以待  
含歛殆若天所相焉宮允君奉諱里居葬且有日矣  
先期來請銘余以媿連故夙耳太安人賢弗敢辭蓋  
吾鄉先進稱砥礪宦業克遺清白史子孫者必屈指  
方齋史公公與厥弟郡守禮齋公同舉嘉靖癸丑進  
士起家山陽令擢即民部累官至楚右使所敷歷皆



餐水茹藥不憂貧家庭間時時稱引疏太傅楊太尉  
事以相慰勗然自令山陽而前梱以內薛夫人主之  
自即民部而後薛夫人歿矣梱以內實太安人主之  
當其宦京邸也祿入重供時寤桂王太安人羹藜飯  
糲殊無厭苦意客至或趣治具輒辦實乃斥瑜珥付  
質家不煩公揮畫也逮從而之粵之浙已復之粵所  
至嚴扃牡室穹鏘戟僕御加甚焉梱外聲絕無所聞  
問諸所拮据茹淡大約不異京邸時比方伯公之楚  
則太安人不復從矣第飭一姬婢往司縫餌而躬視  
宮允君之學于家已方伯公自楚致政歸解其裝枵  
如也太安人喜而慰之曰曩所稱疏太傅楊太尉之  
言乃今睹矣而宮允君自少有穎質方伯公夙心期  
之每手授句讀口授吾伊意授結撰以爲恒而太安  
人所課督尤厲夜篝燈晨趣櫛閱十餘載如一日即  
宮允君貴矣猶時時稱先德勗之以故宮允君清白  
行一意二季亦用文行世其家本母訓也太安人性  
孝謹尤賢明識大體晨興必緝箕執香祖廟嘗蒸釜  
錡身滌且漑務豐腆乃已每從宦則載主就道雖造  
次無闕供薛夫人之伯子歿重遺孤女太安人母之  
若離衷然一經一餐不使已子先而孤女後也稍長



則教之刺絰飾其簪袂以逮結褵之日無怠心厭容  
所撫摩薛夫人之子若婦咸曲意婉約融納鑿若墁  
麓旁觀者莫能睨其隙內外嫺族以時遺之必周其  
待薛黨也尤摯薛氏子事太安人誠姊矣方伯公分  
畀田廬不欲以少子衡伯子顧謂大安人曰若自有  
贏焉意預期官允君也乃太安人深心挹損實未嘗  
有所營度人謂太安人之見其大如此晚歲奉佛最  
篤旦朔必素食已竟年素食在京邸悉屏梁肉醢醢  
弗御曰母負如來其好施予振人之急不以窘故廢  
又終其身靡懈蓋其言曰既以予人已愈有既以勞

人已愈康西方之教也嗟乎迹太安人所施于家詎  
直佛地中人哉即謂之聞道可矣太安人父曰雲岡  
公母管氏世揚之廣陵人太安人所撫薛夫人子三  
曰繼倫曰繼倬曰繼伊倬伊卒而伯前天者曰繼儒  
所出丈夫子三人長即官允君繼偁舉萬曆壬辰進  
士第二人累今官次繼佃次繼任孫男十二人孫女  
六人而延灝有子獻辰是為太安人曾孫瓜瓞之綿  
熾而昌矣蓋余讀官允君狀而悲焉狀云母成立丈  
夫子三而未盡食其樹且羨藜藿蔽之日長而金碧  
鼓鐘之日淺也夫太安人固其食貧耳即見方伯公



地下如生前相慰勞渠寧以彼易此矧食其樹又未  
涯矣宮允君卜以萬曆癸卯年十二月九日奉太安  
人柩祔于方伯公之兆薛夫人先穴其左方伯公所  
嘗定也銘曰將奕其光隆其積將播其蔭厚其植深  
山廣藪良材出溉之培之繁陰密猗與史氏世載德  
爰有太君司閭則麟趾既昌熊丸飭貴而能約老弗  
佚縮乃爲盈豐宜嚮挹之酌之其靡忒餘輝緜緜賁  
幽宅播諸彤管永貽式

中憲大夫雲南按察司副使澄江張公墓誌銘

觀察大夫澄江張公歿且葬矣公子汴汾請銘於黃  
生而省元李君宗謙爲之狀夫狀也者象也李君以  
文技擅一時所摹寫人多矣廼茲狀張觀察也肖其  
象兼傳其神即終身習焉者未之或逮也然習觀察  
公者宜莫如余蓋嘉靖戊申歲御史按泉試諸生有  
聖童張九鼎者操牘握管入其進止委蛇無縮胸周  
章態御史固心異之問其年曰十三矣及覽所奏牘  
蘊藉瑰竒則擊節賞曰此黃香孔融之流亞也遂錄  
置郡庠充博士弟子而公旋連遭父母喪又遭大父



母喪伏在草土者十餘載服除詣督學試督學使者  
咤而訝曰夫御史乃侵官錄士哉吾惜法不能惜才  
竟落之公自是試有司輒弗偶家貧甚授生徒給食  
時余已領鄉薦抑首蓬窓公講舍隣焉時時相過從  
睹其議論濔湧下筆纒纒數千言氣磊落不爲人下  
也然每試則偃蹇如故公嘆曰語有之薑桂不擇地  
而芳詎然哉詎然哉乃航海入粵易其名曰會宗寓  
籍于潮之海澄自邑郡升于督學使連試連得雋遂  
爲其邑庠弟子隆慶丁卯試督學第一其秋薦于粵  
第二知公者語人曰是故張九齡也先是公入潮飄

泊甚困復爲剽盜所刃掠其貲去卧創旅舍幾殆有  
日者譚公祿命謂當芥拾科第而官以臬副脫駕也  
戊辰春余隨計偕吏北上會公于長安道相慰勞如  
平生爲余述日者言沾沾自喜是春公下第歸越辛  
未遂成進士銓授博士于太常公笑曰日者之言稍  
稍驗矣居一歲今 皇帝冲齡嗣位躬親祀典公以  
職事奉祝釐裸常趨蹌 上前 上睹其習容止禮  
儀卒度退齋居而問爲誰左右以公名對自後  
上常日屬焉太常清曹先後官博士者多選爲臺省  
右職公性資慷慨每論古今人物旁及當世務皆侃



侃諤諤披腸嘔心其邁尊貴人高譚濶步不能卑疵  
纖趨爲攀援計司銓者心弗善也重遷公爲兵部武  
庫主事公在庫部督武學其遷爲正郎也領駕署武  
學皆貴游子弟駕署典侍衛馬政郵傳貴戚宦近多  
所請囑公蒞事章程廩廩諸武弁奉法惟謹即窺覲  
干請者亦相戒削迹遁矣蓋張兵部之名冠于曹郎  
云以歲闋出守台州台浙名郡也天台赤城之勝爲  
游士所標集上官亦迂途登焉或請飭厨傳以迂者  
公答曰彼自有雅致柰何以俗吏溷之守遠慙益昌  
令不能代黔庶執役耳郡多豪貴能持吏長短公至

則枉干旌諏詢利病而已其宗鄙盧兒有恣睢犯法  
者一槩繩之不少貸公治郡務在滌煩苛禁非法小  
大之獄兩造伏庭下片言剖決且諄諄溫諭之卒從  
寬貫而爭訟息捐俸修黌宮恤諸貧士集其秀者與  
講藝親課之題其甲乙而青衿奮念大水爲菑檄下  
邑多開支河廣東湖之渚築負明福興之塘鑿高山  
之港而水潦有備治軍簿明覈諸鎮戍要地餉以時  
給卒無呼庚癸且釐屯田時芻糗而士樂超距爲用  
居郡六載一切才名治理流聞被薦書者九矣丙戌  
入計考功郎論斥台屬邑令弗當罪也公爭之強考



功卽目攝曰夫夫也不能自芘安能芘人時蓋有構公者公得調岳州岳故衝蔽當公時水火旱災相踵也公嘆曰夫銓司貽我以簡而造物授我以艱也惡乎辭哉郡苦旱則羸服步禱屬邑苦澇則冒暑省視城陵磯失火則發卒往救停逋賦開庾廩勅有司給糜餉就食者諸皆焦腸蒿目圖之迺其爲岳人圖百世利又至悉也華容瀕湖而邑春夏泛漲卽盧舍眵畝爲墟公庀財鳩役築隄亘百餘里灌莽洫如畫成沃壤人號爲張公隄郡城嚙洪濤善崩而岳陽樓址中枵外潰公募千夫營之自是纍基崇墉屹然金湯之固矣公朴實無它腸其言動措施咸發於惻怛人望而信愛之荆藩構獄屢歲不能決公奉檄訊鞫得情諭以東平河間之雅諸宗大感悔幡然質成約飭諸邑令毋急催科至以逋賦停俸不爲恤百姓頌公德繼負以輸遂上績如倪寬課最蓋公之得人心如此公前後爲守十餘載在岳州憂勤視台州倍之薦剡凡五上乃始擢臬副備兵滇中南抵任適前考功郎據要津復修前郅公遂用人言解鞞歸公又笑曰日者之言驗至是乎命也何尤公先世居晉江張林里曾祖父岳祖父基父贈中憲公文母贈恭人柳氏



無出側室陳恭人實生公公篤至性事嫡母如母事  
叔父如父愛其弟白首不渝而又敦舊故嚴義利初  
官京師有延平友人寄金四百餘歸而歿數載不聞  
問矣比其子訪公台州殊不及寄金事公持橐畀之  
封識宛然方未遇時困厄久既貴而睹人困厄不啻  
其身罹也賑卹施予往往罄囊篋以供性豪飲飲未  
嘗醉比歸自滇南則稍稍謝杯酌日與朋舊對奕而  
已于卧徐行不齒戶以外事有謀以求田問舍者亦  
絕不應收視返聽塊然據梧公蓋歛其神以還太空  
矣公生嘉靖丙申十月二十一日卒萬曆己亥七月

二十四日享年六十有四配郭氏封恭人先公十二  
年卒子男三孫男四先是萬曆丙申冬公卜地東郊  
之龍壽山奉恭人厝焉今公子汴汾以公卒之年十  
二月初七日奉公柩合葬蓋余識公困厄時比公爲  
兵部締兒女姻余懸車後一年而公亦解官旋里故  
曰習公者莫如余銘曰予之早慧遲厥成畀之雄才  
困廼亨人皆追逐我無營優游郎署蜚英聲兩剖郡  
符稱廉平白壁終焉點青蠅釋爾纓冕卧衡荆悠悠  
兩世任醉醒一朝乘化遽長暎吁嗟厚德靳遐齡欲  
問天乎天宵冥存而順也沒而寧勒詞永宅垂令名



高明州貳守賓泉黃公暨配陳孺人蔡孺人墓

誌銘

太史黃君敦柱自使楚來歸將畢其大父母襄事先  
期謁黃生請銘而自具狀曰先贈公口授之遺也復  
持嵩明州志以示黃生曰先大父貳守高明嵩明之  
人俎豆之若齊人之祠石相籍具在故府可按匪直  
孫子私言而已黃生唯唯按狀貳守公諱潛字昭卿  
別號賓泉起家歲薦凡三試京闈弗售乃謁選得嵩  
明州同知高明遐荒人謂官與地皆於公匪稱公忻  
然曰仕以行願耳官與地奚擇哉遂踽踽然策蹇以



行至則咨諏利病悉心爲區畫計開府顧公有所詢  
訪公條上十六事皆鑿鑿中肯竅顧公心儀之會州  
守左遷去遂以州篆屬焉州故土城爲叛酋安銓攻  
毀公請築城以石劑費公帑輸傭閭畝自是而雉堞  
雄壯永奠金湯覺宮在州之西於邢家言弗愜文風  
久頹公遷之州後黃龍山麓其秋登科名者二已而  
嗣興者踵接晉沙河利溉一州秋冬恒苦涸公跋履  
荒度築壩張家山時其蓄洩人擬之浚儀渠焉州東  
北接東川武定尋甸諸界得 出沒公議扼其要害  
倣什伍法練士甲嚴戍守盜賊爲之屏息蓋曩所籌  
畫茲其最鉅者今行之遂爲永利它如廣儲蓄平差  
遺舉屯政限畧田厲窩禁次第舉行皆公夙議也聽  
政餘暇念諸士龍陋寡聞責在師帥則時時接引爲  
之譚經講藝士虛往實歸耳目爲之頓豁即文翁化  
蜀無以喻已居嵩明三載臺使者交獎行且疏薦而  
公倦游矣忽一日嘆曰吾老矣折腰之日視淵明不  
啻久五柳吾事三愧其以埃後人乎遂丐休當道得  
所請懸牀留犢行橐蕭然百姓擁路攀轅至有泣下  
者相與建生祠于張家山念公所興水利處也雨暘  
必禱歲時香火不絕其鄉縉紳請祀公名宦公曩所



陶鑄今猶有存者蓋去後之思久而勿替云初公父  
令尹公業春秋舉省試謂公質魯以故授公易而授  
其伯氏春秋公沉思曰不有以魯得乎故其學攻苦  
刻厲於六籍子史多所淹貫而精研理窟剖抉淵微  
匪重俾佔帖括者嘗手題讀書處曰靜養一心之神  
動觀萬物之變又有四難四要箴四難曰急躁之心  
難管束麤浮之氣難制馭誇大之言難收拾匆卒之  
事難料理四要曰心要寬綽氣要和平易言要簡寡事  
要專思觸目儆心恍若盤盂几席之銘一生涵養得  
力盡在是矣游邑庠試居第一伯氏次之公讓餼伯  
氏學使者義而許焉次年試仍第一乃受餼雖屢躋  
場屋名益重至其言動取與垂稟先民矩矱影衮不  
愧學者翕然宗仰之海內士聞公名多就大學稟業  
曹太史大章者公高弟子也他所造就尤衆公之以  
歲薦仕以貳守終人咸惜其位不稱德云家居杜門  
自老日惟焚香靜室課諸子讀書舊架古蠹繙閱註  
解咲曰此自吾生涯與諸子共之屏外事樂不與聞  
性不喜華麗其持身刑家務崇纖儉衣必布素食必  
蔬糲恒語諸子曰作法於涼其弊猶奢歲時謁先隴  
輒灑淚哀迴不忍去贈公體公意得村落舊屋庇為



書舍鑿池種樹公約客眺咏其中扁其堂曰高山仰止軒曰習靜蓋靜山爲令尹公別號用以寄孝思且勗後人焉郡大夫欽重公以鄉飲酒禮延公賓席再三請皆謝不赴邑里人士謂黃氏世宦胥不顯然行業楷模皦皦維則其子孫象賢有以矣公先世莆田黃石人有宋黃公度之裔元末避亂遷于泉三傳至宗養宗養生滿滿生靜山公泰弘治辛酉薦于鄉官至武康令公其第三子也公元配陳氏鄉進士陳寧女進士尚文妹也家世華閥而孺人躬澹泊勤織紝有孟光椎布操作風每祭祀賓客供餽時時佐以簪珥無所愛諸娣姒慕孺人知書了文義遣女就學孺人爲耳提口授儼然一外傅矣舅武康公宦歸姑丘孺人逝二媵棟家時有難調戢者孺人日周旋其間調之如和羹戢之如引繩能令其牙距潛銷閨閣用是雍睦姻黨謂其有儒生氣象非弟女流中稱賢者不幸早歿詳具于公所作傳中繼配蔡孺人安溪處士蔡璣女自于歸廟見公持一子一女付之即陳孺人出也孺人多方鞠育及長而冠笄婚嫁皆殫心力營之至所自出者丈夫子三女二皆教以孝弟儉勤聞以內權洽無間即贈公忘其爲異母弟弟也當贈



公歿時年六十矣孺人猶問藥食節寒溫煦煦如視  
孺子比歿則號天大慟曰何不以其老身代其慈愛篤  
摯如此乃至霜天緝纏老而生日不為樂動輒稱先  
公之訓則若與陳孺人先後步趨已太史君事孺人  
久言及之猶隱隱悲痛也公子男四廷甫郡庠生贈  
翰林院編脩陳孺人出廷范郡庠生廷徵廷南俱蔡  
孺人出女四孫男十六人曾孫男三十一人黃生曰  
方公之歸自嵩明也以五柳自娛三槐俟後豈意不  
可一世姑借是自遣者今諸孫中太史司理最著太  
史公輔器司理遂遂篤行君子也諸以文行稱者猶  
自不多公之取償於造物不已弘哉曩日之言殆若  
券驗葬之緩又若有待也先是太史君請告里居以  
萬曆甲辰二月卜吉於南安縣二十一都安內山之  
原營為三壙已告成事茲卜萬曆丁未年十二月初  
二日辰時乃奉其大父母柩葬焉蓋承諸人之意圖  
之若此其慎也銘曰樹德滋矣久乃逾章積慶厚矣  
久乃逾長其有待耶無待耶青鳥白鶴之占以有待  
呈祥素絲黃卷之業以無待熾昌勒徽樂石夜臺有  
光



嘉議大夫浙江按察使肖兼蔡公墓誌銘

憲使同安蔡公諱貴易字爾通又字道生與余同舉進士公生嘉靖戊戌正月十一日卒萬曆丁酉正月二十六日春秋六十憶不孝居先慈喪也公辱臨弔慰之睹其體甚康神甚王乃不數月而訃聞矣今公子選部體國君卜葬公于其邑民安十都董水獅山之陽而乞銘於余嗟乎吾郡士同戊辰舉者十有八人今重存者三耳河清有期人生不疾余方逃虛抱寂遨廣莫之野以畢餘生顧又不勝其生死存亡之感也惡乎辭銘公之先世家浯州平林曾祖父文周



祖父宜勲皆有處士之誼父鄉進士公宗德官廣西  
梧州府通判比公貴贈祖父父皆中大夫貴州布政  
司左叅政祖母呂母洪皆淑人公喪父時年甫十五  
耳已哀毀如不勝喪洪淑人督公學甚厲公亦刻志  
憤發弱冠學成補邑弟子員嘉靖甲子薦于鄉越隆  
慶戊辰成進士謁銓爲江都令奉洪淑人諱未之官  
服除補令崇德崇德縮浙西孔道舳舻冠蓋相銜接  
其事劇而民疲公蒞事則約已勅下悉罷諸供應之  
擾民者過賓至束脯授餐如禮時時罄私橐以具然  
至顯貴人亦無所加腆邑民當輸粢京庾奸胥獵賄  
恒以意爲高下公差產授役毫釐不爽人呼爲神明  
而疲羸者稍稍甦矣嗣乃復包角堰以捍海潮創尊  
經閣群諸生講業以振弦誦即任怨任勞弗恤也含  
山巨盜楊雷潘榜者糾聚橫行莫敢問浙以西苦震  
隣臺使者謀遣將兵之公曰無庸乃用間計擒其魁  
餘黨解散三方安堵蓋隣郡咸頌蔡令云賢聲聞晉  
南京戶部陝西司主事陝西司董錦衣八倉弊竇如  
鼠穴公日坐糶糠塵垢中雖盛夏隆寒不少避官吏  
曹役靡獲表裏爲奸者滿考晉浙江司員外郎督浦  
口倉一如督京倉時未幾晉郎中祠部祠署素號清



適公閉戶讀書而已壬午寧波郡守缺而余文敏相  
君者郡人也則請公於銓部曰此吾門下士知其能  
澤我邦人也既得公則貽書戒其家曰是其報我不  
以私無庸私覲也公至而造請士大夫問民疾苦其  
或通關說撓三尺即詞色無所假貸而相府之舍人  
兒無敢鼓聲燄雄里中矣公吏事精敏即千夫之夥  
數年之後凡一矚皆能辦其形貌舉其姓名然性復  
宏厚薄鈎距蠶厲之治務在存大體去泰甚而已先  
是諸衛所賂結府胥那借軍儲至數千金無還計公  
悉蒐致之法饒蠹一清海上漁商二稅舊輸郡帑公  
議貯之郵定兩邑著爲令曰郡牘故在耳靈門外跨  
大江爲浮梁兩涯隙地爲豪家占以築室渡者壅遂  
圮一日溺百餘人公廉得其狀立毀之仍爲文祭溺  
者民自是無所患苦居郡五載諸所頒條教卹刑獄  
修舉廢墜皆用外寬內明得士民心比遷貴州臬副  
士民勒碑頌之貴州峻遠且地瘠宦游者徃徃生快  
快念公分臬叅藩皆在焉恬然安之無幾微見言而  
題其軒曰運甓示不以休暇自逸也嘗署督學所校  
拔多雋士又嘗署司篆第謹守管籥出納之美弗問  
已癸巳晉浙江按察使浙士民間之喜曰是故浙中



良守令矣而公亦樂用浙會吳興董范事起訟者蜩  
集公一切用安靜鎮之不為理曰是無賴子易煽安  
足聽也撫按知公不為動則徑下之道若府而范司  
成竟投繯死事聞 上震怒當事者咸獲重譴人始  
服公能持重得大體至其風厲群吏則振綱紀慎激  
揚貪墨者望風解印綬遁矣是時公方負駿望乙未  
入計臺史有中讒搆公短者輿論為之不平顧銓部  
重失言官意竟鐫一秩當候補而公子選部君方謁  
告在里公慨然曰古人有言無官一身輕有子萬事  
足吾歸趣吾兒代報稱耳遂趣裝出都門相知有力  
者競挽留公公飄然不顧也公素恬任進不能陰陽  
世俗與俱上下亦不能結權貴干薦引為今與守皆  
著卓異聲矣乃其遷也一得留曹一投遐裔則皆以  
寡援故當余文敏輔政時有建開金塘大榭之策者  
謂可墾腴田二萬畝佐軍興文敏從中主之監司業  
唯唯促畚鍤役公曰此國初所徙地也役蒸黔而資  
巨室詎庸利乎既力白於上官復究極利害為文敏  
陳之文敏答曰某鄙人不知其不便若是事遂寢公  
挺立行一意類如此然亦卒無枘鑿恒自謂有天幸  
矣通籍垂三十年絕不營溫飽計自祿入外視之若



將浼已其自崇德趣留都也徽人商崇德者感公不  
擾恩贖四百金追至姑蘇獻焉公悚然曰此山陰百  
錢耶峻卻之諸商歸而立四知亭侈其事貴寧所部  
安酋國亨嘗遣人投牒若將有所覬者公叱牒還之  
揮其人使亟去自是安酋頽首受約束惟謹曰畏使  
君清耳觀察蘇大夫君禹頽其堂曰清白蓋實錄云  
家居恬淡寡嗜屋無華椽食不重肉絕妾媵之奉而  
獨軫貧窮隆施予內外親朋待以舉饗殮畢婚葬者  
凡若干人念兵燹後鄉族多失祀者則買地置壇每  
歲兩灑飯焉居常手不釋卷為詩文得唐人家法晚  
頗覽佛道經用書畫自娛暇則與故人譚舊為懽謹  
有以公府事干者輒謝去曰里棲而家於有司孰與  
仕進而家於官乎吾即貧柰何以改吾素易貴之日  
囊穠蕭然周身外咸倉皇假貸而辦可謂以德終矣  
今崇之生祠歸然在望閩學使者俞弟子員之請祀  
公黌宮與崇之鄉賢祠數千里交相映也斯足慰公  
九原云所著詩文集藏于家公嘗欲結菴東山之麓  
飯僧奉佛以答父母恩名曰報劬又念別駕公側室  
楊無子執節於令甲應旌欲列上其事者屢矣未就  
而歿蓋公之永念先人如此豈與夫逐逐聲利規一



身之奉者同也公前配累贈淑人葉氏婉嫕有婦德克佐外修歸三年卒為嘉靖庚申八月十三日距生嘉靖壬寅七月十四日得歲十九藁葬城北繼配累封淑人黃氏子一獻臣體國其字萬曆己丑進士南京吏部文選司郎中孫男三謙先定先學先體國君卜今己亥十二月初九日奉公柩并啓葉淑人窆合葬焉虛其左為黃淑人壽藏銘曰令有中牟守則穎川十道之使首曰象先奕奕古人公兼似焉脫屣榮祿終老林泉修之于家其德乃全未竟之志付諸嗣

贈承德郎工部都水司主事雙林洪公暨配封

太安人林氏墓誌銘

雙林洪贈公諱以詵字德益世居南安英山之麓配林太安人世居安溪赤嶺而皆徙居郡城公家之徙郡城也自大父直齋公孟暄始而公父遐溪公溥母蔣孺人獨屏跡山居以避坊置課農桑為樂時洪氏文風颺起如郡丞英溪公侍御芹谷公蟬連科第皆從郡中奮以故公奉父命就郡士友問業即怙恃在念弗能從也每歲時定省輒褰迴山齋弗忍去遐溪公趣之曰若第効孳乳駒不作蜚騰計耶則姑載袖



以行遐溪公或以事抵郡舍公候侍終日昏旦視寢膳惟謹林太安人伺嗜好調甘膳奉之諸紉組衣履遙致之姑所者又不啻擊蹠而獻也嘉靖季年郡中倭英山結為賊巢遐溪公與蔣孺人復入郡城以居公與太安人謀曰二尊人老矣今假我以返哺之日心力庸自愛耶時服必豫旨蓄必克所屬意親賓至必庀具款延供竟日歡娛譚笑二老人相與愉快每語所親曰使我棄其田廬而無愁嘆之聲者家兒與婦耳遐溪公性嚴公輔以寬和處二弟藹如也然不設惰容不輕諧謔能令人嚴憚季弟性儻宕至對公必飭必共蓄產經公手二弟不復置意郡從十許人視如手足無少長油然懽洽內外親有所芬構往往就公亭平乃至含慝負信則逡巡不敢進生平篤親舊重然諾急人之厄蔣孺人弟既謝諸生貧窶甚公周給無虛日解衣推食撫其孤迄成立不衰兩女弟適人者家山海陬一際時躋一遇家難幾弗克自存公為悉心綜理靡愛貲力衽席哺啜之甚備而脫簪解佩佐緩急者太安人也當倭寇充斥時英山佃僕望主舍投止或逋歸自賊巢疾疫傳染眾議格不納公惻然曰居閒藉其力急而棄之不仁竟置諸旁舍



歿者給楮病者予藥而中堂以內千指晏堵無恙諸  
避難全活者咸慶有天馬寇退蒼頭某間行還里徼  
卒掩以爲盜傳致郡庭公亟趨申救郡太守色動公  
指天日力誓無他會邑令素信公爲請得解公慮寇  
且復至則倡諸宗人就山築壁塢障諸復業者旋以  
山塢乏水移平地附澗以守而公家腴田若干在營  
度中公請於遐溪公捐而成之人頌公高誼勝庾袞  
云公逾冠遊邑庠顧每試不得志於有司嘗語人曰  
支干家言我生之辰不值顯星而值天嗣吾緒業其  
付吾子乎伯子懋正君奉公教年十四補弟子員公  
督之益勤集諸少儁于藝圃坐觀對壘而黃生翔偕  
焉月三會每會必至所爲課成篇評甲乙儼若明師  
蒞之也嘗念先正有言此生不學此日閒過此身一  
敗爲三可惜於是構書舍顏其額曰三惜軒令肄業  
其中者不啻盤盂几杖之警而公仲子懋庸季子懋  
遜時亦彬彬穎露矣公具嚴日課抵暮歸則太安人  
設榻張燈列坐之而課夜讀公聞伊吾聲輒迫然喜  
曰是又一女師也歲甲子仲子受知督學姜公拔優  
廩餼尋檄召會城講業名日起矣越明歲而公病馳  
手書呼仲來還仲抵子舍兩閱月而公卒內外族姻



以至閭黨細岷山村佃僕奔赴悲惋多有哭失聲者  
是時季子未弁仲季二女未笄遭田里荒亂後家中  
窘太安人黽勉補苴如絰敝裘其課三子益厲常語  
三子曰吾今乃兼為而父矣稍嬉惰呵譴隨之及所  
善社友過從輒出脯醢勞之特腆余黃生戲謂懋正  
君母無煩鬻鬢也儕侶中詎有范存廉乎仲既免喪  
應恩薦又五載寓死武林太安人潛自飲泣而外示  
抑情者以無貽舅姑感日語伯及季泮厲成父志而  
仲倘不亡耳比季子舉于鄉太安人稍為色喜顧猶  
扼腕流涕恨承德公不及觀也蓋自承德公歿太安

人營男女婚嫁肩舅姑養生送死事又督諸子學所  
含辛茹董者百端而風範凜然季子六上公車始登  
第為南安司理太安人諭之曰兒困厄有日矣驥伏  
櫪則長嘶騰驤或躡足兒其慎之司理以廉慎明允  
稱應徵召得主事起部而伯子亦應恩薦分教遂昌  
太安人復諭之曰官無崇卑為人師實難勿以官卑  
隳而志季子駁歷著賢聲而伯子亦虔其官以宜于  
庶士皆奉母教也方季君之得守廣州也適以奉使  
入里門念母老投牒乞侍養當道難之太安人躍然  
曰簡書有程兒豈不逞將母耶遂趣就版輿之粵居



半載思歸季子復以終養請上官憐其意予兩月假  
奉太安人就闈界畀諸孫迎歸里太安人素寡疾歸  
而掃室靜居迥更寒暑陶如也迺不豫者三日遂化  
去矣公先世為陳尚書某之裔遠祖某贅於洪因從  
其姓凡四世皆隻身著代五傳而同產二人長謹獨  
公觀生為公高祖有子八其五為存誠公新綸傳直  
齋公孟暄俱以隱德重賓筵而太安人父則為太學  
生新溪公回云季君滿司理考贈公文林郎封太  
孺人比主事起部遇覃恩則進贈封如今秩公享年  
四十有五太安人享年九十子男三有觀以學訓奉  
諱歸今陞浙江僊居知縣有秩戊辰恩貢入國學  
卒有助萬曆壬辰進士廣東廣州府知府公墓在晉  
江縣四十一都埭北後山鄉之原坐乾揖巽公子懋  
正君懋遜君卜以萬曆己酉年十二月初七日奉公  
及太安人柩葬焉先期謁黃生翔請銘憶翔之奉教  
於公也童則名之冠則字之其評騭藝文於禪射無  
所回隱藹然通家子姓誼也而太安人之教其子翔  
亦竊以自淑焉今日之役烏乎辭銘曰以詩書禮樂  
之宗風而或培其始或厚其終以九十望百之遐年  
而或得其半或享其全論逢年於穠蔭豈必盡諧所



願顧其食報於生前與身後者均足徵得天之左券

衢州府別駕中藍李公暨配王孺人墓誌銘

是歲萬曆戊申孝廉李君棧卜以冬十月朔日奉父  
別駕中藍公母王孺人柩葬于惠安縣十七都白石  
山之原先期謁余請銘狀出其從兄儀部君筆儀部  
君素耿直其言覈又余夙知公乃按状态志之曰公諱  
灝字子觀世郡之安溪人至公父月峰公始徙居郡  
郭李爲安溪鼎族自南豐令公煜舉景泰庚午鄉試  
詩書之澤始顯而旌義公森以慷慨好義名乃奕奕  
出簪纓上森生炯炯生坤坤生月峯公鉞月峯公餽  
于岸其佃僮喜施予如旌義公娶劉孺人生丈夫子



二公其仲也公自幼警敏刻厲角卯游邑庠公配王氏爲惠州守王公鏃孫女亦自幼以賢淑稱既歸公而茹淡服素克相公學公以嘉靖丙午領鄉薦方茂年也凡九上春官弗售至隆慶辛未年望艾矣心私自揆曰漢孫寶有言士不遭者可無不爲直有激云耳要以伸道售志奚必取遭一第遂謁銓爲衢州府通判衢故劇郡又冠蓋絡繹道也於公性雅弗宜廼其沉默不炫仁心爲質亦能令上下信之嘗攝郡篆又嘗假令于龍游常山江山開化諸邑氓以爭訟詣前者第諄諄曉諭無煩鉤鉅亦無煩閉閣所至有質成風一切治理流聞士民頌焉倅掌錢穀戶有幫索例里胥藉以乾沒其中公嘆曰鸞鳳鷹鷂姑置勿論乃與狐鼠輩營窟穴耶悉從几上搔除之所司董織造當上留都例亦有所脂潤公夫心冰蘖毫無染也性樸訥不能與世俗低昂適當事者聽讒弋有所媒孽於公公時在留都聞之灑然曰雞肋一官羊腸世路乃成吾高遜矣吾逾艾未嗣奚戀戀浮榮爲竣事後取副室周氏買輕舟南還王孺人先期發郡邸待公闕嶺衢士民日携壺漿伺江干無從踪跡也抵里廡門謝客不問闕外事居五載而孝廉君生公得嗣



晚絕憐愛之孺人亦視同離裏均不欲以督責傷恩而孝廉君有異質公喜曰是兒也才紹箕裘不煩身楚吾徼天幸厚已所延師或致諸里塾或簡自宗中皆優為之禮過其望每孝廉君丙夜伊吾公據榻聽之忘寐矣孺人亦匡坐燭影中無少倦色是時儀部君已成進士其封公素以式穀之誨聞公與封公最莫逆時時稱引以自慰焉歲庚子孝廉君果弱冠魁八閩人謂公之克有令嗣非直善教也蓋又有德善之報焉公志行敦篤事二尊人孝每先形聲迎志意曲當其權心居喪號擗毀甚殆不欲生孺人羽翼其

間存奉甘腴歿共享奠秩秩然叶于則也宗鄙中至比公王戴而以南宮婦稱孺人伯兄歿諸從子未長公寧之如子又躬督其家棟伯產藉不旁落今從子茶陵州守楨上舍生櫛咸事公若怙恃焉公雖不家于官然席先世之遺佐以節嗇衣無華食無怙交遊無雜賓肩輿出入一奚童後之人不知公故貴也故其家亦日以饒給而公所擘畫籌量務在倡義舉恤貧乏又不崇崇為節嗇計者旌義公舊有祀田郡祠中歲並可供一祭而已公意少之謀諸儀部君儀部君曰禮謂賢者能備夫備則通之綏祖考惠子姓無



之而非百順伯父可謂能備矣公曰然遂割田百畝入祀自祠禴嘗蒸之外裒其餘公諸族衆間有婚嫁死喪苦不給者又時時捐私橐輔之諸取辦於公若外藏乙未泉中歲大侵民飢出粟數百斛賑之里中人賴以舉饗殮者亡慮數百家迄于今口碑籍籍咸謂公富而好行其德已郡邑大夫高其誼延鄉大賓者六僅一應至望廬造請幾作鑿坏遁也孺人素善病兀坐匡牀如在禪中晚嗜西方教常施枰榼收露幣垂絕時猶莊誦佛經數遍蓋慈悲其天性云憶余從宦過三衢以水洞陸行駐郵舍郵卒頌李使君清甚具余笑曰李使君家世饒不清奚覲郵卒遂巡答曰夫欲富者詎有涯哉自是李使君不欲耳余又笑而頷之公里居曾招余與詹司寇飲儀制君之封公在焉公縷譚今古間一舉觴封公侑以壺榼代勸酬而公泊如也若不知人間有引滿浮白事者其真樸類如此嗟乎叔世有如公者直當於古人求之矣公子男一即孝廉棫女五孫男二熾昌之慶蓋未艾也公與孺人墓負乙揖辛蓋孝廉君于讀禮中卜而得吉者銘曰真宰茫茫握魁柄浮生營營拙者勝公施於邦其未竟施之於家亦爲政去後見思論乃定積



善之券曰餘慶老蚌生珠光照乘高懸屏星隱相映  
亦有閨闈式穀並雙玉埋矣佳氣迎遺床猶爾輝巒  
嶺

戶部主事潛齋趙公暨配安人汪氏合葬墓誌  
銘

吾邑趙氏有世德又以麟經世其家余曩受經則私  
淑特峯先生而慕與潛齋公友居常相得懽甚公今  
歿矣公之子潘相世典郡守世徵敦公葬事而預以  
誌銘屬余余不辭按狀志之公諱日新字用甫其先  
自光州固始徙于泉世居文山里均寧公者載上  
城西之井下里居焉均寧生永傳永傳生森贈戶部  
主事森生瑞登弘治庚戌進士歷戶部郎中以廉直  
顯見郡志瑞生信贈戶部主事信生特峯先生恒登



嘉靖戊戌進士累官姚安守配王恭人妻十五月而生公公生而廣穎豐下器度異凡兒人爲特峯先生賀曰穀也後子矣稍長傳父業聰敏強記好讀奇書爲文章多好作奇語署其齋曰潛所以矯也嘉靖戊午舉鄉薦第五隆慶辛未舉進士筮仕分宜令有賢聲中讒弋改教旌德尋遷國子監博士轉爲丞七閱歲廼晉戶部主事距登第十有六載矣昔潘岳叙所歷宦自謂拙者之効有識笑之惟公廼真拙耳公性介特不屑爲阿諛以媚上官視貴勢漠如也以故了沉淪幾不能自振既徙官戶署念父春秋高遂丐歸然其身里居不爲悔方公在國學時余叨貳司成故事兩司成辟諸生私謁丞以下弗禁也公獨時稱疾鍵戶自海內名士暨梓里素交而外一槩謝弗接惟署中升散一一如其候不避勞視諸生講德問業不啻如其子弟也廼至評騭文藝又若操衡懸鑑兩司成無復置甲乙士忻然鄉往之顧邸中則聞寂自如而先是公在旌德日延見諸生靡懈第弗受贊耳或訝焉舉以質公公答曰今黌宇具官博士倚席不講青衿子不一延見即師資奚賴焉辟雍有日課有月課士相與朝夕多矣奚庸私謁爲人服公得司



教體公嘗語人曰吾生平宦不遂徼天幸竊祿閒曹  
所殫瘁苦心惟分宜令而廼被萋菲躓命也夫蓋分  
宜故嚴相里也其俗俠者善怙勢恣爲姦利弱者積  
爲豪家魚肉凋劫甚又自嚴相敗奉重譴籍其家引  
繩批根閱數載如催宿逋公下車嘆曰上與下俱病  
矣爲民父母之謂何時臨見三老問疾苦煦煦咻  
之所興除犁然中窺民謂我令君趙氏冬日也諸桀  
黠鼠而社者虎而冠者時摘舐得主名擊斷之不少  
貸四境肅然歲賦南糧北布上輸京師所司額外乾  
沒沿爲例公至日主藏吏以例請公怒斥之曰乃公  
不爲例也者而乃以浚民例也它如徵納羨耗一切  
裁罷而是時主計者方新立條鞭法行之自江右始  
甫有緒未竟公爲詳綜覈酌催役杜詭冒猾胥擺指  
邑中稱平旁邑按爲挈令贖鍰故有常額而公聽斷  
多所散遣不責贖第曰令爲赤子受譴足矣公爲政  
務削繁去苛鎮以安靜誠意坦衷驟睹聞之若迂濶  
後廼捷得竒中如與神明合民有兄弟叔侄訟者公  
徐爲理論寬譬俾自悔解有某子甲求終訟不已公  
叱遣之曰吾持三尺按若易耳第凶橫者且有鬼責  
其人出邑門隨道斃人益駭服公邑苦虎患每攫傷



市人以為常公手勑為牒禱諸社旦驅車出西閭而  
虎適至則屈足頰首伏圈檻受法觀者神之擬諸東  
漢童恢云郡司理某者奉檄與公督嚴氏沒產性酷  
急復株逮低昂惟意公爭之強不為屈會司理桎嚴  
氏耕夫督賣其耕犂甚亟公睹而駭曰耕犂自農家  
有耳於嚴氏產奚與立破械歸之曰余請任其咎司  
理積憾日螫公竟用左調公自謂殫瘁苦心諒矣公  
之自曹郎告歸也以念高堂養故已復以疾自廢謝  
絕世事昕夕問寢饒浣淪已耳間延一二舊遊接杯  
酒道平生為樂又時與上下古今不待据几按籍若  
倒囊出之所居重城西故廬田無負郭汚邪數畝處  
之晏若時或獨笑語人莫測也蓋家居十五載而卒  
公配安人汪氏贛郡別駕萬里之女也而侍御旦為  
安人大父汪故殷冑綺紈金玉之裝故自饒也安人  
獨曰吾為士人妻耳安用華為而斥珥贈佩以佐公  
學公既從宦矣安人又曰趙氏世食貧耳又安用華  
為而躬布素甘藜鹽以佐公宦蓋自安人歸于趙而  
尊章妯娌靡弗稱安人賢者特峯先生性素嚴家庭  
間時有譴訶聲安人為冢婦垂五十年不聞訶一語  
也二子皆幼而雅醇知向學迺安人課之殊厲於嚴



君稱兩嘗從次子之宦邸每問平反迪仁恕有雋母  
風既受封有章服矣一再御輒屏之筭中其天性質  
樸老而不渝如此晚歲為公置側室竟有子曰世文  
安人撫教之置膝下若已出蓋恒情鮮儷云公以仲  
子世徵滿大理寺寺正之考進階承德郎而安人亦  
從公封曩余與公結文字社公所稱畏友惟張憲使  
明遇洪藩使懋純暨余而三顧獨數語余曰子公卿  
器也余謏劣慙負公許可然故慕公為人公意氣峭  
直其議論常歸長厚每云福善禍淫彼蒼弗爽燕閒  
中縷縷為二子道之杜機權不記人過當左調時第

曰有彼蒼在絕不以司理見螫故與睚眦報復念逮  
司理之子以貲入太學公特善遇之視諸生有加蓋  
公之長厚多此類然公雖躓于今嘗夢鈴山壓其署  
中而仲子世徵產焉分宜人謂徵靈名山以報公德  
其淹頓國學歷春秋計偕者再廼伯子世典以丙戌  
成進士公亦旋晉官歸士為公頌願者奚啻百千計  
矣公所云天道且久而益驗也公及安人墓在惠邑  
十七都安代石柱山之原葬以萬曆甲辰十月念六  
日銘曰高才而仕不達劉孝標嘆之蓋已自昔而然  
作善降之百祥先哲有云豈曰其靡常之天試觀趙



八部與厥配安人之崇壠其爲衆口羨慕券福方來  
孰與南陽原氏之阡

安溪學生新峰林公暨配劉氏合葬墓誌銘

林生櫛卜葬其大母劉祔於大父新峰公之兆念新  
峰公葬時墓中之石未具也圖乞銘於余而因汝寧  
守震西林君以請汝寧君者公高弟子也夫法言重  
於侯芭遺文編於李漢弟令汝寧君含毫伸楮自足  
不朽公矣又奚藉余言也然余聞公名日久公名鴻  
儒字允德泉之安溪人卜居郡城公生稟異質稍長  
篤學善屬文尤精研博涉於六經子史靡所不闕學  
使者婺源潘公都試泉郡士拔公首選比省試主司  
得公牘復大奇之互爭元魁不相下乃竟置公以需



後舉時嘉靖甲午也公年甫弱冠耳已而學使者熊公校安邑士復首公優之餼廩然八試棘闈弗偶公雖久躡場屋而聲名乃籍甚吾郡自藩臬大吏郡邑守宰咸心識林茂材者參知王遵巖先生以文章擅一時見公文輒嘖嘖嗟異通公於毗陵唐荆川太史遂爲千里外相知而公業尚書多所自得剖析疑義洞澈奧突所著有日錄行世郡中士爭執贄爲弟子而是時父處士公母許方康強在養也公所受贄幣悉以奉尊人甘溫不私橐尺帛寸鏹處士公晚病痺困卧床蓐公侍膳羞奉湯煇動不解帶者經月即體

羸善病不以其故稍懈家居郡城每謁先祠于清溪問諸父昆弟起居詞意敦懇聞族黨中有一善必極口游揚其有過輒問問教誡人胥赧而改焉公素性恬寂布衣蔬食終其身泊然安之即有司雅相欽慕絕不因而造請晚歲遂謝絕進取念日與門徒論學修輯家譜嘗奉處士公命往收責里中目睹里人貧窶狀歸以具白處士公遂憐而蠲之蓋其爲德于鄉又如此公之歿也享年僅四十有九經喪其師學亡其朋里黨失一良士咸咨咨焉以爲恨公配劉孺人躬操作虔孝養以佐公學逮公歿茹荼啖辛生事死



葬足慰公地下課其子應漢業領賢書矣竟中道六  
已復課其孫櫛俾不隕箕裘緒宗黨中咸稱孺人賢  
蓋孺人肩林氏宗祊者凡四世而詩書之遺重爾弗  
墜人謂天之報施公迄于今未定也黃生曰士頌法  
先王砥行閭里豈必陵厲青雲乃克肖表見哉徵辟  
不應之孫期幽居一室之侯瑾以文行著聲當代遂  
獲與虎觀諸儒並登史冊今邑士列公孝行文學請  
勒之邑乘以永令名褒賢尚德實應古誼余因銘公  
墓曰俗學熾競帖括媒聲利本先撥有哲士標素揭  
曠躬修慎摩挾繹經傳邪衆說旁貫穿才踔越模與  
示芳躅天道遠予或奪高才阨壯心輟嗇厥年終  
以有賢佐襄內闈詩禮業綿不絕溯隆積斬駿發  
以瑛券可擬世系及生卒年月男女婚嫁之詳列  
于左方